



Kalaallit Nunaanni Danmarkimilu ilinniartoqarfiit peqqinnissamut tunngassutillit akunnerminni suleqatigiinnissamut isumaqatigiissusiornissaannut suliniuteqartoqassagaluarpit pitsaaqutit iluaqutissallu misissornissaannut suleqatigiissitamik pilersitsinissamut Naalakkersuisut peqquneqarnissaanik Inatsisartut aalajangiiffigisassaattut siunnersuut. Suleqatigiinnissamut isumaqatigiissut sumiiffinni nittartagaq aqqutigalugu ilinniakkanik qaffassarnerit pikkorissarnerillu atorneqarsinnaaneri qulakkiissavaat. Tamanna inuiaqatigiinni sumiiffiit ilaanni isumaginninnikkut peqqinnissatigullu immikkut ilisimasalinnik pisariaqartitsinermut naaperiaataassaaq. Suleqatigiissitap suliani UKA 2023-mi naammassisimassavaa.

(Inatsisartunut ilaasortaq Anna Wangenheim, Demokraatit)
(siullermeerneqarnera)

Qujanaq Demokraatit Inatsisartunut ilaasortaataannut Anna Wangenheim-imut pitsaasumut siumullu isigisumut siunnersuuteqarneranut.

Peqqinnissaqarfik pitsaasoq ingerlalluarterlu tamatsinnut pingaartuuvoq. Maani inersuarmi arlaannaataluunniit kissaatiginngilaa, peqqinnissaqarfik ingerlalluanngitsoq. Anguniagaq isumaqatigiissutigaarput – isumaqatigiinnginnerit pilersarput paasinialeraangatsigu, anguniagaq qanoq ililluta angussaneripput.

Tassani parteeqatiga siunnersuuteqartorlu Anna Wangenheim nersortariaqarpara. Anna peqqinnissaqarfimmi unammillernartunut ilisimasarpassuaqarpoq politikkeritut maani Inatsisartuni, Peqqissutsimut Naalakkersuisuusimasutut minnerunngitsumillu peqqissaasutut misilittagaqarnermini. Taamaammallu oqallinnerni peqqinnissamut tunngassuteqartuni Annap isummersuutigisartagai paasisimasaqarluarnermik piginnaasaqarluarnermillu tunngaveqartutut isigilluinnartarlugit.

Uuminnga siunnersuuteqarnermini tunngavilersuutigaa, nittartagaq aqqutigalugu ilinniakkanik qaffassaannerit pikkorissarnerillu piffinni ileqquliunneqartussatut qulakkeerneqarnissaat, inernerissallugulu inuiaqatigiit nunatsinni piffinni sulisunik amerlanernik pisariaqartitsinerisa isumaginninnermi peqqinnissaqarfimmi immikkut piginnaasaqartunik pigineqalissammata. Tamanna pissaaq peqqinnissamut tunngassutillit ilinniarsiit Kalaallit Nunaanni Danmarkimilu suleqatigiinnermut isumaqatigiissuteqarnerisigut.

Isumaqarpunga, isumassarsiatsialaasoq. Ilinniarniq qaffassarnerlu sulineq tamaat pissaaq, uumalu siunnersuutip tamanna qulakkeersinnaavaa taamatuttaarlu sineriatsinni peqqinnissaqarfimmi sulisunut piginnaasanik pisariaqartinneqartunik tunniussisinnaalluni.

Naalakkersuisut akissuteqaataanni paasivara, ullumikkut peqqinnissamut tunngasununi ilaatigut isumaqatigiissuteqareersoq, tamannalu pitsaasuvoq. Takusinnaangilarali, isumaqatigiissutit pioreersut



allanut isumaqatigiissusiornissamut ajoqutaasinnaanerat. Aamma isumaqanngilanga, Naalakkersuisut isummersuutaat, Peqqinnissaq pillugu ataatsimiititaliarsuup isumaliuutissiisutaata utaqqinissaanik pitsaasuusoq. Peqqinnissaqarfimmi suna tamaat unitsissinnaanngilarput, utaqqinitsinni. Suleqatigiissutissatut siunnersuutigineqartoq saniatigut ingerlalluarsinnaavoq.

Taamatut oqaaseqaateqarluta siunnersuutip akuerineqarnissaa innersuussutigaarput ataatsimiititaliami susassaqartumi suliarineqarnissaa innersuussutigalugu.